

مقال

البخور

مقال عن استخدام البخور في صلوات الكنيسة الأرثوذكسية ... الخلفية الكتابية لاستخدامه، و طقس استخدامه في صلوات الكنيسة، و المعنى الروحي الذي يرمز إليه

البخور من المكوّنات الأساسية في صلوات كنيستنا ... بنشوفه كل يوم في القداس، و حتى عشية و باكر اسمهم (رفع بخور)

ترتيب الصفحة

البخور في العهد القديم

استخدام البخور كذبيحة في العهد القديم



البخور في العهد الجديد

استمرار استخدام البخور في الكنيسة الأولى



رمز البخور في الكنيسة

المعنى الروحي لاستخدام البخور




البخور في طقس الكنيسة

استخدام البخور في ليتورجيا الكنيسة



البخور

1: البخور في العهد القديم



في الحقيقة استخدام البخور بدأ كوصيّة واضحة من ربنا في شريعة العهد القديم .. و البخور له ذكر و استخدام واضح في العهد القديم

- **في سفر الخروج** بنلاقي ربنا بيوصي موسى النبي إنه يبني مذبح البخور في خيمة الاجتماع ... و مذبح البخور كان في القدس (يعني هارون الكاهن و الكهنة بعده بس اللي يدخلوا يوقدوا بخور عليه)

... و البخور ده كان باكر و عشية

... و فيه وضوح في مواصفات البخور و إزاي يتعمل ... و وضوح إنه بخور مقدّس ماينفّش يُستخدم غير في العبادة

و تصنع مذبحاً لإيقاد البخور. من خشب السنط تصنعه. ... وتجعله قدام الحجاب الذي أمام تابوت الشهادة. قدام الغطاء الذي على الشهادة حيث أجمع بك. فيوقد عليه هارون بخوراً عطراً كل صباح، حين يصلح السرج يوقده. وحين يصعد هارون السرج في العشية يوقده. بخوراً دائماً أمام الرب في أجيالكم.

— خروج 30 : 1 ل 10

- و في سفر العدد، لما حاول **قورح و داثان و أبيرام** إنهم يقَدّموا البخور بغير حق، ربنا عاقبهم ... و لما الشعب اتذكّر جامد على موسى و هارون، أوصى موسى هارون إنه بسرعة يوقد بخور عشان يطلّي لربنا عشان مايفنّش الشعب ... و ربنا قَبِل

ثم قال موسى لهارون: «خذ المجمعرة واجعل فيها نارا من على المذبح، وضع بخورا، واذهب بها مسرعا إلى الجماعة وكفر عنهم، لأن السخط قد خرج من قبل الرب. قد ابتدأ الوبأ». فأخذ هارون كما قال موسى، وركض إلى وسط الجماعة، وإذا الوبأ قد ابتدأ في الشعب. فوضع البخور وكفر عن الشعب

— عدد 16 : 46 و 47

- بعد كده بفترة كان فيه **ملك اسمه عَزَيَا** دخل و أوقد بخور رغم إن لا يحق له ... و ربنا لم يقبل منه بل أصابه بالبرص (أخبار أيام ثاني إصحاح 26) ... إذاً تقديم البخور شغل الكهنة بس

- و الوصية فضلت مكملة بعد بناء هيكل سليمان ... **وصولاً حتى لذكريا الكاهن** اللي بشره الملك بميلاد يوحنا و هو يرفع البخور (زي ما بنقول في ذكصولوجيات شهر كيهك)

فبينما هو يكهن في نوبة فرقته أمام الله، حسب عادة الكهنوت، أصابته القرعة أن يدخل إلى هيكل الرب ويبخر. وكان كل جمهور الشعب يصلون خارجا وقت البخور. فظهر له ملاك الرب واقفا عن يمين مذبح البخور.

— لوقا 1 : 5 ل 11

- كمان فيه **نبوة واضحة جداً** من آخر نبي في العهد القديم (ملاخي) عن استخدام البخور في كنيسة العهد الجديد

... و لو تاخذوا بالكم، الآية دي بنقولها زي ما هي في **(مستحق و عادل) في القديس الكيرلسي**

لأنه من مشرق الشمس إلى مغربها اسمي عظيم بين الأمم، وفي كل مكان يقرب لاسمي بخور وتقدمة طاهرة، لأن اسمي عظيم بين الأمم، قال رب الجنود

— ملاخي 1 : 11

2: البخور في العهد الجديد



مش بس في العهد القديم ... البخور موجود بوضوح في العهد الجديد

- **في هدايا المجوس لربنا يسوع** كان فيه البخور (اللبان) ... لأن ربنا رئيس كهنة العهد الجديد ... و دي إشارة واضحة لاستمرار البخور في كهنوت العهد الجديد

وأتوا إلى البيت، ورأوا الصبي مع مريم أمه. فخرؤا وسجدوا له. ثم فتحوا كنوزهم وقدموا له هدايا: ذهباً ولباناً ومرراً

— متى 2 : 11

- و حتى في السماء ... **في سفر الرؤيا**, شاف القديس يوحنا ال 24 قسيس يقدموا البخور لربنا ...
و شاف ملاك بيقدم البخور قدام ربنا

خزّت الأربعة الحيوانات والأربعة والعشرون شيخاً أمام الخروف, ولهم كل واحد قيثارات
وجامات من ذهب مملوءة بخوراً هي صلوات القديسين

— رؤيا 5 : 8

3: رمز البخور في الكنيسة

بعد ما عرفنا بسرعة البخور في الكتاب المقدس, تعالوا نعرف هو بيرمز لإيه

1. **حضرة الله وسط شعبه** لأننا زي ما نقرا في العهد القديم, ربنا كان بيكلّم شعبه من عامود
السحاب ... و السحاب اللي بيطلع من البخور رمز لحضور مجد ربنا

2. تحترق حبّاته بالنار: رمز الحرارة الروحية في الصلاة .. و **بذل الذات** ... لأن حبة البخور بعد شوية
بتتحرق خالص ... زي القديسين اللي قدّموا ذواتهم ذبيحة طيبة لربنا ... و أعظم تقدمة هي
إنك تقدّم ذاتك ذبيحة حب لربنا
قول جميل لمار إفرام السرياني: "قد جعلت ذاتي كنيسة للمسيح, ومرتب له داخلها بخور أو طيب
بأعقاب جسدي"

3. الرائحة العطرة للبخور هي **رائحة المسيح الذكيّة** ... و دي وصية ربنا في العهد القديم إن
البخور لازم يكون عَطر

4. صعود البخور لفوق رمز **صعود صلواتنا للسماء** زي ما قرينا في سفر الرؤيا ... و البخور على
طول بيشدّ نظرنا لفوق .. للسماء

طبعاً الشورية نفسها لها معاني روحية جميلة نقدر نعرف أكثر عنها [هنا](#)


4: البخور في طقس الكنيسة



البخور جزء لا يتجزأ من صلوات الكنيسة ... و له استخدامات مختلفة

- **دورة البخور:** بنلاقي أبونا لما يبجي يمस्क الشورية و يبخر (في رفع بخور أو عشية), بيحط 5 أيادي (معالق) بخور ...
 رمز لرجال العهد القديم اللي قدّموا ذبائح مقبولة لربنا: هابيل الصديق - نوح - ملشصادق - هارون - زكريا الكاهن (أبو يوحنا المعمدان)
 بيبخر بالترتيب ده:

1. قدام المذبح و حواليه: إشارة لوجود ربنا على المذبح
2. عند باب الهيكل: بالترتيب ده



3. **قدام المنجلية:** احتراماً و تقديساً لكلمة ربنا
4. **قدام الأيقونات:** لأننا بنشترك مع القديسين في الصلاة
5. **وسط الشعب:** عشان أبونا ياخذ صلاة الشعب معاه و هو راجع المذبح ... ترتفع مثل البخور
كمان البخور بيطهر الشعب (زي ما قرينا في عدد 16) ... عشان كده أبونا بيصلى (سر إعتراف الشعب)، وفى صلاة بخور باكر يقول أبونا:

إقبل إليك هذا البخور من أيدينا نحن الخطاة رائحة بخور غفراناً لخطايانا مع بقية شعبك

- **في دورة البولس:** ... أبونا بيلف الكنيسة كلها (لأن بولس الرسول لف و كرز للعالم كله) ... و يقول:

أعطنا يا رب أن نُصعد أمامك ذبائح ناطقة وصعائد بركة و بخوراً روحانياً يدخل إلى الحجاب في موضع قدس قديسيك

في الكاثوليكون مافيش دورة بخور إشارة لقول ربنا للتلاميذ إنهم يستنوا حلول الروح القدس في أورشليم

- **في دورة الإبركسيس:** ... أبونا بيلف الكنيسة نصف لفة و يقول:

اللهم الذي قبل ذبيحة أبينا إبراهيم وبدلاً من إسحق أعددت له خروفاً، إقبل منا نحن أيضاً يا ملكنا محرقة هذا البخور

- **و إحنا بنقول أجبوس:** ... يمسك أبونا الشورية ويضع بها يد بخور ويقف أمام باب الهيكل يبخر .. مشاركاً بذلك السمايين فى تسبيحهم وبخورهم

- **في أوشية الإنجيل و أثناء قراءة الإنجيل:**

... قبل أوشية الإنجيل، أبونا بيضع بخور في الشورية و يبخر بيها ... و أثناء قراءة الإنجيل بيرجع يمسك الشورية و يبخر و هو يقول صلاة اسمها (سر الإنجيل)

- **لما أبونا يقول (تجسد و تأنس):** ... بيحط بخور في الشورية ... رمز لتجسد الابن في بطن العذرا مريم

- **قبل التقديس:** قبل ما أبونا يمسك القربانة و يقَدِّسها (و هو بيقول و وضع لنا هذا السر العظيم ...) أبونا بيحط إيدِه على الشورية ... بيخَرّ يديه عشان يقَدِّسهما

- **بعد المجمع (في الترحيم):** أبونا برضه بيحط بخور و يبَخّر ... إشارة للحنوط الذي وضعه يوسف الرامي ونيقوديموس على جسد السيد المسيح عند دفنه ... و إشارة للرائحة الذكية بتاعة القديسين اللي سبقونا في الكنيسة المنتصرة

**ربنا يَدِينا كل ما نشوف البخور و نشمّ رائحته الجميلة, نصليّ عشان تصعد صلواتنا
معا**



المراجع

- كتاب كنيسة الأرثوذكسية, ما أجملك!
- كتاب اللاهوت المقارن لقداسة البابا شنودة الثالث
- مقدمة في علم اللاهوت الطقسي - القمص إشعياء عبد السيد فرج
- مقال "البخور في الكنيسة" لنيافة الأنبا روفائيل
- كتاب أسئلة طقسية وإجابات روحية لنيافة الأنبا متاؤس